

Ia Buka Susua Te Mosese Pu Takilae Jenesesi

CHAPATA 1

VAHAVOROA e God pa tinalavuni ia vangavanga oro ia soloso.

2 Mani hua pu sanu inomina kani hua uka ia soloso, oro kare uka ka tongana; oro chabo tou ia nga maliogo ia lao. Mani ia nga Spirit te God na vagitia ia korekore idere.

3 Mani, Mu rane, hua e God: henriane.

4 Mani omia e God ia rane pu leana: mani pajaka vailolo loa ia e God pa maliogo ia rane.

5 Mani vakila nia Rane e God ia rane, mani ia maliogo ieni vakila nia Ipu ia. Mani ia veluelu oro ia mamarane riedi ia rane susua.

6 Mani, Mu la pa korapak idere hoi na velevelebangara pata di varipajaki ria idere, hua e God.

7 Mani tavetea e God ia velevelebangara mani varipajaka ni ria idere pu ko pa kauruna ia velevelebangara oro ria idere pu ko pa chakeuluna ia velevelebangara no: mani hua tungana.

8 Mani vakila nia Vangavanga e God ia velevelebangara. Mani ia veluelu oro ia mamarane riedi ia vinakarua rane.

9 Mani, Mu varihagonoi pa meka vasina hamu na idere pu ko pa kauruna ia vangavanga, pata ni taomi ia puava popana, hua e God: mani hua tungana.

10 Mani vakila nia Soloso e God ia puava popana; mani vakila nia Kolo ia ria vinarihagohagonoi ta idere: mani omia e God pu leana.

11 Mu havoro pa soloso hamu na checheu, oro na chacha hae pu ure, oro ia hae pu ure pu ari patuna, pu huhua tunga ia, pu ari urena, pa soloso, hua e God: mani hua tungana.

12 Mani havoroa checheu ia soloso, oro ia chacha hae pu ure pu huhua tunga ia, oro ia hae pu ure, pu ari urena, pu huhua tunga ia: mani omia e God pu leana.

13 Mani ia veluelu oro ia mamarane riedi ia vinahike rane.

14 Mani, Mu havoro pa velevelebangara pa vangavanga hamu na rane pata ni tapajaka vae vailolo loai pa maliogo ia rane; pata riedi vahavoro hilahila, madi taatei ria kolokolo, oro ria rane, oro ria buruburu:

15 Madi varane pa velevelebangara pa vangavanga pata di varanea ia soloso, hua e God: mani hua tungana.

16 Mani tavetei e God rie karua rane getedi; ia rane pu gete vasusua ieni pata bangara nina ia rane, mani ia rane pu kikina ieni pata bangara nina ia ipu: oro ria cheru mana ia tunga na tavetei.

17 Mani vekoi e God pa velevelebangara pa vangavanga pata varanena ia soloso hua.

18 Oro pata di bangara pana rane oro pana ipu: oro pata pajaka vaena pa maliogo ia rane; mani omia e God pu leana.

19 Mani ia veluelu oro ia mamarane riedi ia vinamade rane.

20 Mani, Mu havoro vasoku pa idere hamu na tingitonga pu vagiti oro pu ari mi tino, oro hamu na oloko pata mu kovuru charava pa velevelebangara pa vangavanga pa titirona ia soloso, hua e God.

21 Mani vahavoroi e God ria ivu lavata, oro tongania tingitonga todi pu vagiti, pu havoro vasoku pa idere, pu huhua tunga ria: oro tongania oloko pu ari chacharavadi pu huhua tunga ia: mani omia e God pu leana.

22 Mani mama ni e God ie ria, mani, Mu varikovukovurui, mamu soku, mamu vapangai ria idere pa kolo, oro mu havoro vasoku pa soloso hamu na oloko, hua ni ia.

23 Mani ia veluelu oro ia mamarane riedi ia vinalima rane.

24 Mani, Mu havoro pa soloso hamu na tingitonga todi pu huhua tunga ia, ria bulumakau, oro ria tingitonga pu haba, oro ria mademaholedi pa soloso pu huhua tunga ria, hua e God: mani hua tungana.

25 Mani tavetei e God ria mademaholedi pa soloso pu huhua tunga ria, oro bulumakau pu huhua tunga ria, oro tongania tingitonga pu haba pa soloso pu huhua tunga ria: mani omia e God pu leana.

26 Mani, Aria da tavete vakake nia tahita ia tinoni, pata ni hua puta hita: pata di bangara ni ria ra ihana pa idere, oro ria oloko pa velevelebangara, oro ria bulumakau, oro tongania soloso, oro tongania tingitonga haba pu haba pa soloso, hua e God.

27 Heni vahavoro vakake nia e God pa tania ia tinoni, ni vahavoro vakake nia e God pa tania ie ia; vahavoro ni tinoni na manemanke ia ie ria.

28 Mani mana ni e God ie ria, mani, Mu varikovukovurui, mamu soku, mamu vapanga ia soloso, oro mu bangara nia: mamu bangara ni ria ihana pa idere, oro ria oloko pa velevelebangara, oro tongania tingitonga todii pu vagiti pa soloso, hua ni e God ie ria.

29 Mani, Mu avoso mae, tongania chacha hae pu ure ra riegu vatuu ni raka tahamu, rie pu ko pa tongania soloso ra, oro tongania hae, ria hae pu ure oro pu koi patitudi; rie pedi nginongo tahamu.

30 Vala ni raka ta tongania mademaholedi pa soloso, oro ta tongania oloko pa velevelebangara, oro ta tongania tingitonga pu haba pa soloso pu to, tongania chacha hae pu buma pata hadi nginongo ria, hua ia: mani hua tungana.

31 Mani omi e God tongania tingitonga pu tavetei ia, mani omia ia pu leana uka. Mani ia veluelu oro ia mamarane riedi ia vinaonomo rane.

CHAPATA 2

HEDI beto ria vangavanga oro ia soloso, oro tongania tingitonga pa tadiria.

2 Mani te vabetoi tu e God ria tinateve pu tavetei ia ro mani kaduvu ia vinajuapa rane; mani ko ehele ni ia pa vinajuapa rane tongania tinavete pu tavetei ia ro.

3 Mani mana nia e God ia vinajuapa rane, oro vahopea ia: puna ko ehele ni ia pa ranena tongania tinavete pu tavetei e God.

4 Pira ria vinahavorodi ria vangavanga na soloso ie pa kolokolona pu tavahavoro ria, ie pa rane pu tavetei e Jihova God ia soloso oro ria vangavanga.

5 Oro ie pa kadi te to pa soloso tongania rikiroko pa maloka, oro ie pa kadi te to tongania chacha hae pa goana: puna iena kani te vahore mae nia mugata e Jihova God ia soloso, oro kare ka tinoni pu te chevaria ia puava.

6 Mana vuha vura nga pa soloso ia kou, mani chuvechuvea ia tongania chakeuluna ia puava.

7 Na ugoro puava nga mani vahavoroa e Jihova God ia tinoni, manila singo nuguru la nia ia pa korapa isuna ia ia siningo tino; mani havoro tinoni tona ia tinoni.

8 Mani chokou nia e Jihova God pa kalena pa chupakaini pa Ideni ie meka chigo; mani vekoa ia pa vasina ia tinoni pu vahavoroa ia no.

9 Mani pa puava nga ni vato vurai e Jihova God tongania hae pu variavaomijonga, oro leadi na nginodi; ia hae tino mana ko tunga pa korapania chigo, oro ia hae pu atei nia chienia oro leana.

10 Mani vura pa Ideni ia meka piongo mata chuvechuvenia ia chigo hua; mani tapajaka ni ka made takachenia.

11 Pa Pisoni ia kilana ie pu susua no: mani ieni ene varidukui tou nina ia puava pa Havila, pa vasina pu koe gol;

12 Mani ia golo pa puava noni ieni leana: oro pa vasina koe idaka deliamu na onikisi.

13 Pa Gihoni ia kilana ia vinakarua piongo no: mani ieni ene varidukui tou nina tongania puava pa Itiopia.

14 Pa Hidekelo ia kilana ia vinahike piongo: mani ieni vura la hua pa chupakaini pa Asiria. Mani ia vina-made piongo ieni Iuparatesi.

15 Mani vae ia e Jihova God ia tinoni no, ni veko lae pa korapania ia chigo pa Ideni pata ni pada ia oro chakei nia ia hua.

16 Mani, Tongania hae pa chigo ra riemu tavamagua ni nga hoi na nginodi.

17 Mani ia nga hae pu atei nia chienia oro leana na, iemu kare ngo uka ia ngina hoi: puna pa ranena nga

pula ngoe hoi ia iemu ngina legu puta ngana, hua e Jihova God na jama ia ia tinoni no.

18 Mani, Kani leana pula ko hese talena ia tinoni; ngina magu tavete vala nia mekae pata ni toka nina ia, hua e Jihova God.

19 Oro na puava nga mani vahavoroi e Jihova God tongania mademahaledi pa maloka, oro tongania ria oloko pa velevelebangara; manila tala la nia ia pate Adamu pata ni atei nane ie pe vakila ni ia hua: henri rie pu vakila ni e Adamu tongania tingitonga todi ro, riedi ria tunga kiladi ria.

20 Mani vakinakilai e Adamu tongania bulumakau, oro ria oloko pa velevelebangara, oro tongania mademahaledi pa maloka; mana ia nga e Adamu ieni kare mekae pata toka nina.

21 Mani vamucha puilingia e Jihova God ie Adamu, mani mucha ia: mani vae ia meka rasorasona ia, mani vamumi pulea ia borabora pa vasina;

22 Mani ia nga rasoraso pu vae ia e Jihova God pa tania tinoni no, ieni tavete nia ia ie meka manemanek, manila tala la nia pa tania tinoni.

23 Mani, Pa hua pia ni ia pia ieni susuri pa susurigu, oro borabora pa boraboragu: henri, Manemanek ie pe kilana ia, puna vinaena nga pa ta Tinoni, hua e Adamu.

24 Heni ngina loa pa tinana tamana ia tinoni, mani ngina soto tania ororeke tania: madi ngina meka boradi ngana.

25 Madi pigopigogolodi kakae, ia tinoni oro ia ororeke tania, mana kadi kekeea.

CHAPATA 3

TE TEINA vasusua ia noki madila la ria mademahaledi pu tavete vekoi e Jihova God pa maloka ro. Mani, Uve, Kare ngoi ngina tongania hae pa chigo, rina hua niamu e God ie hamu? hua nia ia ia manemanek.

2 Mani, Gura ngoi nga hamni ria uredi ria hae pa chigo:

3 Mana ia urena ia hae ni ko pa lea korapana ia chigo na, iemu, Kare ngo ia, oro mu kare hidukua, moko mu legu ngina, ieni hua nia e God, hua nia ia manemanek ia noki.

4 Mani, Kamu rina legu nginao:

5 Puna atei nia e God ieni pa ranena pula ngo ia hamu ia, riedi ngina tahairi ria matami, mamu ngina hua ria god, mamu atei nia ieni chiena oro leana, hua nia noki ia manemanek.

6 Mani pa kolokolona omia ia manemanek ia hae pu leana nginona, oro varivaomijonga, oro ia hae pu tahivae pata varivatetei, ni lopete vae ia urena, mani ngoe, oro valae tunga ia tania palabatu pu ko talana ia; mani ngoe ia.

7 Madi tahairi kakae ria matadi ria, madi atei nidi pu pigopigogolodi; boruhuaedi vae roko hae figi madi pidili varikapa ni, madi tavete dia tivitivi.

8 Madi avosoa ria ia lineo jinama te Jihova God pu ene pa chigo pana rane pa kolokolo manomanobu: mani liungu pa tiana e Jihova God pa hahaeiani pa chigo e Adamu oro ia ororeke tania.

9 Avei ie hoi? hua nia e Jihova God ie Adamu na obolea.

10 Mani, Avosoa nga raka ia lineo jinama tamuhoi pa chigo, hegutalo-kete, puna pigopigogologu; hegutliungu, hua ia.

11 Mani, Esei na hua niho ie hoi na hemu pigopigogolomu? Rina ngoe tunga hoi ia hae, pu, Kare ngoe, pu hua veko nia raka tamuhoi no? hua nia ia.

12 Mani, Ia manemanek pu vamae nia hoi pata ko talao raka pu hua no, na vamae nia taguraka ia urena ia hae, hegutliungu, hua ia tinoni na jama la.

13 Mani, Na sa iemu toni hoi pia? hua nia e Jihova God ia manemanek. Mani, Ia noki tu na ngangulio raka, hegutliungu, hua ia manemanek.

14 Mani, Puna tonua hoi ia tinavete ia, hemu takulehu vasusua madila ia tongania bulumakau, oro pa tongania mademahaledi pa maloka ie hoi; na tiamu nga pemu ene nia ie hoi, oro na puava nga pemu ngoe pa tongania rane pa mua tino:

15 Magu ngina varikesa niamu raka ie hakarua manemanek, oro ia tumu hoi oro ia tuna ia; ngina vamasora ia ia na chalivimu, oro bohe mehelena nia ia pemu vamasora ia ie hoi, hua e Jihova God na jama la tania noki.

16 Ngina vahavoro vasokui raka ria tinalovohoho oro binote tamuhoi; ngina legu hua mamu to pula kovukovuru ie hoi; mani ia hiniva tamuhoi pe ko kauru pa palabatu tamuhoi, mani ia pe bangara niho, hua nia ia ia mane-maneke.

17 Puna avosoa hoi ia jinama tania ororeke tamuhoi, mamu ngo ia ia hae, pu, Kare ngo ia ngina, pu hua veko nia raka tamuhoi no: heni pa tamuhoi nga ni takulehui ia puava; pa tinalovohoho mamu ngina ngongo pa tania pa tongania rane pa tino mu ie hoi;

18 Na tingitonga varichopuru oro na rogha rie pemu tavahavoro datu ni hoi pa tania; na kinudu nga pa maloka rie pemu ngoi hoi;

19 Ngina tarekareka isumatamu hoi mamu ngina ngo, nginongo, mamula havoro puava pule mua ngana; puna pa vasina nga vinaemu ie hoi: puna na puava nga ie hoi, hemu ngina puava pule tungana, hua ia na jama la te Adamu.

20 E Ivi ni vakila nia e Adamu ia ororeke tania; puna tinana tongania tinoni ie ia.

21 Mani tavete vala ni e Jihova God pate Adamu oro pa tania ororeke tania ria pokon korekore mani vapokoi.

22 Mani, Mu avoso mae, na tinoni na ieni havoro hua meka hita, pu atei nina ieni chiena oro leana; henin moko ni chuchuku la nia ia pa hua ia ia limana, mani vae tunga ia urena ia hae tino, mani ngoe, manila to uka ngina, hua e Jihova God:

23 Boruhuaeni chitu loa nia e Jihova God pa chigo Ideni, pata ni tavetee ia ia puava pa vasina pu tavae ia ia no hua.

24 Henila chitu tera nia ia ia tinoni; mani vekoi ia pa kalena pa chupakaini pa Ideni ria Cherubimi, madi viu iloro nia ia leboto ikuchu, na chakei nina ia huana la pa hae tino.

The Bible in Marovo
53 © B.F.B.S.
ISBN 0 647 10410 5

Published by The Bible Society
in the South Pacific
P.O. Box 5173, Raiwaqa,
Marovo Suva, Fiji

Printed in Hong Kong by C.T.P.S. BSSP/1977/IM